

增修埤雅廣要

增修埤雅廣要卷第五

地道門

瀛海類

十洲記

漢武帝既聞王母說八方巨海之中有祖洲瀛洲玄洲炎洲長洲元洲流洲生洲鳳洲麟洲聚窟洲有此十洲乃人跡所稀絕處又始知東方朔非世常人是以延之曲室而親問十洲所有之物名故書記之方朔云臣學仙者耳非得道之人以國家之盛美將招名儒墨於文教之內

抑絕俗之道於虛詭之迹臣故韜隱逸而赴王
庭藏養生而侍朱闕矣亦由遵上好道且復欲
抑絕其威儀也曾隨師主履行比至朱陵扶桑
蜃海冥夜之丘純陽之陵始青之下月宮之間
內遊七丘中旋十洲踐赤縣而遨五嶽行陂澤
而息名山臣自少及今周流六天廣陟天光極
於是矣未若凌虛之子飛真之官上下九天洞
視百方北極勾陳而并華蓋南翔太丹而棲大
夏東之通陽之霞西薄寒穴之野日月所不逮
星漢所不與其上無復物其下無復底臣所識

乃及於是愧不足以酬廣訪矣

祖洲

祖洲近在東海之中地方五百里去西岸七萬里上有不死之草草形如菰苗長三四尺人已死三日者以草覆之皆當時活也服之令人長生昔秦始皇大苑中多枉死者橫道有鳥如鳥狀齧此草覆死人面當時起坐而自活也有司聞奏始皇遣使者齎草以問北郭鬼谷先生鬼谷先生云此草是東海祖洲不死之草生瓊田中或名爲養神芝其葉菰苗叢生一株可活一

地輿記卷五
人始皇於是慨然言曰可採得否乃使使者徐
福發童男童女五百人率攝樓船等入海尋祖
洲遂不返福道士也字君房後亦得道也

瀛洲

瀛洲在東海中地方四千里大抵是對會稽去
西岸七十萬里上生神芝仙草又有玉石高且
千丈出泉如酒味甘名之爲玉醴泉飲之數升
輒醉令人長生洲上多仙家風俗似吳人山川
如中國也

玄洲

玄洲在北海之中戊亥之地方七千二百里去南岸三十六萬里上有太玄都仙伯真公所治多丘山又有風山聲響如雷電對天西北門上多太玄仙官宮室各異饒金芝玉草乃是三天君下治之處甚肅肅也

炎洲

炎洲在南海中地方二千里去北岸九萬里上有風生獸似豹青色大如狸張網取之積薪數車以燒之薪盡而獸不然灰中而立毛亦不焦斫刺不入打之如皮囊以鐵鎚鍛其頭數十下

乃死而張口向風須臾復活以石上菖蒲塞其鼻卽死取其燭和菊花服之盡十斤得壽五百年又有火林山山中有火光獸大如鼠毛長三四寸或赤或白山可三百里許晦夜卽見此山林乃是此獸光照狀與火光相似取其獸毛緝以爲布時人號爲火浣布此是也國人衣服垢汚以灰汁浣之終無潔淨唯火燒此衣服兩盤飯間振擺其垢自落

長洲

長洲一名青丘在南海辰巳之地方各五千里

去岸二十五萬里上饒山川及多大樹樹乃有
二千圍者一洲之上專是林木故一名青丘又
有仙草靈藥甘液玉英靡所不有又有風山山
恒震聲有紫府宮天真仙女遊於此地

元洲

元洲在北海中地方三千里去南岸十萬里上
有五芝玄澗澗水如蜜漿飲之長生與天地相
畢服此五芝亦得長生不死

流洲

流洲在西海中地方三千里去東岸十九萬里

上多山川積石名爲昆吾治其石作鐵作劍光明洞照如水精狀割玉物如割泥

生洲

生洲在東海丑寅之間接蓬萊十七萬里地方二千五百里去西岸二十三萬里上有仙家數萬天氣安和芝草常生地無寒暑安養萬物亦多山川仙草其洲之水味如飴酥

鳳麟洲

鳳麟洲在西海之中央地方一千五百里洲四面有弱水繞之鴻毛不浮不可越也洲上多鳳

麟數萬各爲羣又有山川池澤及神藥百種亦多仙家煮鳳啄及麟角合煎作膠名之爲續弦膠或名連金泥此膠能續弓弩已斷之弦刀劍斷折之金更以膠連續之使力士掣之他處乃斷所續之處終無斷也武帝天漢三年帝幸北海祠恒山四月西國王使至獻此膠四兩吉光毛裘武帝受以付外庫不知膠裘二物之妙用也以爲西國雖遠而上貢者不奇稽留使者未遣又時武帝幸華林園射虎弓弩弦斷使者時從駕上膠一分口濡以續弩弦帝驚曰異物也

乃使武士數人共對掣引之終日不脫如未續
時也膠色青如碧玉吉光毛裘黃色蓋神馬之
類也裘入水數日不沉入火不焦帝於是乃悟
厚謝使者而遣去賜以牡桂乾姜等諸物是西
方國之所無者又益思東方朔之遠見周穆王
時西胡獻昆吾割玉刀及夜光常滿盃刀長一
尺盃受三升刀切玉如切泥盃是白玉之精光
明夜照冥夕出盃於中庭以向天比明而水汁
已滿於盃中也汁甘而香美真靈瑞之器秦始
皇時西胡獻切玉刀無復常滿盃耳如此膠之

所出從鳳麟洲來劍之所出必從流洲來並是西海中所有也

聚窟洲

聚窟洲在西海中申未之地方三千里北接崑崙山二十六萬里土東岸二十四萬里上多真仙靈官宮第比門不可勝數及有獅子辟邪鑿齒天鹿長牙銅頭鐵額之獸洲上有大山形似人鳥之象因名之爲人鳥山山多大樹與楓木相類而花葉香聞數百里名爲反魂樹扣其樹亦能自作聲聲如羣牛吼聞之者皆心震神駭

伐其木根心於玉釜中煮取汁更微火煎如黑
飴狀令可丸之名曰驚精香或名之爲震靈香
或名之爲反生香或名之爲震擅香或名之爲
人鳥精或名之爲却死香一種六名斯靈物也
香氣聞數百里死者在地聞香氣乃活不復亡
也以香薰死人更加神驗延和三年武帝幸安
定西胡月支國王遣使獻香四兩大如雀卵黑
如桑椹帝以香非中國所有以付外庫又獻猛
獸一頭形如五六十日犬子大似狸而色黃命
國使將入呈帝見之使者抱之似犬羸細禿悴

帝怪問使者此小物可美何謂猛獸使者對曰
夫威加百禽者不必繫之以大小是以神麟爲
巨象之王鸞鳳爲大鵬之宗百足之蟲制於螭
蛇亦不在於巨細也臣國去此三十萬里國有
常占東風入律百旬不休青雲干呂連月不散
者當知中國時有好道之君我王固將賤百家
而貴道儒薄金玉而厚靈物也故搜奇蘊而貢
神香步天林而請猛獸乘毳車而濟弱淵策驥
足以度飛沙契濶途遙辛勞蹊路于今已十三
年矣神香起天殘之死疾猛獸却百邪之魅鬼

夫此二物實濟衆生之至要助政化之昇平豈
圖陛下反不知真乎是臣國占風之謬矣今日
仰鑒天姿乃非有道之君也眼多視則貪色口
多言則犯難身多動則淫賊心多飾則奢侈未
有用此四者而成天下之治也武帝恣然不平
又問使者猛獸何方而伏百禽食噉何物脅力
何比其所生何鄉耶使者曰猛獸所出或生崑
崙或生玄圃或生聚窟或生天路其獸不窮食
氣飲露解人言語仁惠忠怒當其仁也愛護蠢
動不犯虎豹當其威也一聲呌發千人伏息牛

馬百物驚斷絙繫武士奄忽失其勢力當其神也立興風雲吐嗽雨露百邪迸走蛟龍騰驚處于太上之廐役之元王辟邪之長帥者也靈香雖少斯更生之神九疫病災死者將能起之及聞氣者卽活也芳又特甚故難歇也於是帝使使者令猛獸發聲試德之使者乃指獸命喚一聲獸虺脣良久忽呌如天大雷霹靂又兩目礮礮之交光光朗衝天良久乃止帝登時顛蹶掩耳震動不能自止侍者及武士虎賁皆失杖伏地諸内外牛馬豕犬之屬皆絕絆離驚駭放蕩

許久乃定帝忌之因此獸付上林苑令虎食之
於是虎聞獸來相聚屈積如死虎伏獸入苑經
上虎頭溺虎口去十步已來顧視虎虎輒閉目
帝恨使者言不遜欲收之明日失使者及猛獸
所在遣四出尋討不知所止到後元元年長安
城內病者數百亡者大半帝試取月支神香燒
之於城內其死未三月者皆活芳氣經三月不
歇於是信知其神物也乃更秘錄餘香後一旦
又失之檢函封印如故無復香也帝愈懊恨恨
不禮待於使者益貴方朔之遺語自愧求李君

之不勤慙衛叔卿於堦庭矣明年帝崩于五柞宮已亡月支國人烏山震檀却死等香也向使厚待使者帝崩之時何緣不得靈香之用耶自令命殞矣

滄海島

滄海島在北海中地方三千里去岸二十一萬里海四面繞島各廣五千里水皆蒼色仙人謂之滄海也島上俱是大山積石至多石象八石石腦石桂英流丹黃子石膽之輩百餘種皆生於島石服之神仙長生島中有紫石宮室九老

仙都所治仙宮數萬人居焉

方丈洲

方丈洲在東海中心西南東北岸正等方丈方面各五千里上專是羣龍所聚有金玉琉璃之宮三天司命所治之處羣仙不欲昇天者皆往此洲受太玄生錄仙家數十萬耕田種芝草課計頃畝如種稻狀亦有玉石泉上有九源丈人宮王領天下及龍蛇巨鯨陰精水獸之輩

扶桑

扶桑在東海之東岸直陸行登岸一萬里東復

有碧海海廣狹浩汗與東海等水不鹹苦正作
碧色甘香味美扶桑在碧海之中地方萬里上
有太帝宮太真東王父所治處地多林木葉皆
如桑又有榘樹長者數千丈大二千餘圍樹兩
兩同根偶生更相依倚是以名爲扶桑仙人食
其榘而一體皆作金光色飛翔空玄其樹雖大
其葉榘故如中夏之桑也但榘稀而色赤九千
歲一生實耳味絕甘香美地生紫金九玉如中
夏之瓦石狀真仙靈官變化萬萬端蓋無常形
亦有能分形爲百身十丈者也

蓬丘

蓬丘蓬萊山是也對東海之東北岸周廻五千里外別有圓海海繞山圓海水正黑故謂之冥海也無風而洪波百丈不可得往來上有九老丈人九天真王宮蓋太上真人所居唯飛仙能到其處耳

崑崙

崑崙號曰崑陵在西海之戌地北海之亥地去岸十三萬里又有弱水周廻繞而山東南接積石圖西北接北戶之室東北臨大活之井西南

至承淵之谷此四角大山寔崑崙之支輔也積石圖南頭是王母告周穆王云咸陽去此四十六萬里山高平地三萬六千里上有三角方廣萬里形似偃盆下狹上廣故名曰崑崙山三角其一角正北干辰之輝名曰閼風巔其一角正西名曰玄圃臺其一角正東名曰崑崙宮其一角有積金爲天墉城面方千里城上安金臺五所玉樓十二所其北戶山承淵山又有墉城金臺玉樓相鮮如流精之闕光碧玉之堂瓊華之室紫翠丹房錦雲燭日朱霞九光西王母之所

治也真官仙靈之所宗上通璿璣元氣流布五
常玉衡理九天而調陰陽品物羣生希奇特著
皆在於此天人濟濟不可具記此乃天地之根
組萬度之綱柄矣是以太上名山鬲於五方鎮
地理也號天柱於眡城象綱輔也諸百川極深
水靈居之其陰難到故治無常處非如丘陵而
可得論爾乃天地設位物象之宜上聖觀方緣
形而著爾乃處玄風於西極坐王母於坤鄉昆
吾鎮於流澤扶桑植於碧津離合火生而光獸
生於炎野坎總衆陰是以仙都宅于海島艮位

名山蓬上鎮於寅丑巽體元女養巨木於長洲
高風鼓於羣龍之位暢靈符於瑕丘至妙玄深
幽神難盡真人隱宅靈陵所在六合之內豈唯
數處而已哉此蓋舉其末爾臣朔所見不博未
能宣通王母及上元夫人聖旨昔曾聞之於得
道者說此十洲大丘靈阜皆是真仙奧墟神官
所治其餘山川萬端並無覲者矣其北海外又
有鐘山在北海之子地隔弱水之北一萬九千
里高一萬三千里上方七千里周旋三萬里產
生玉芝及神草四十餘種上有金臺玉闕亦元

氣之所含天帝君治處也鍾山之南有平邪山
北有蛟龍山西有勁草山東有束木山四山並
鍾山之枝幹也四山高鍾山三萬里官城五所
如一登四面山下望乃見鍾山爾四面山乃天
帝君之城域也仙真之人出入道經自一路從
平邪山東南入穴中乃到鍾山北阿門外也天
帝君總九天之維貴無比焉山源周廻具有四
城之高但當心有觀於崑崙也昔禹洪水旣畢
乃乘蹻車度弱水而到此山祠上帝於北阿歸
大功於九天又禹經諸五嶽使工刻石識其里

數高下其字科斗書非漢人所書今太尺里數
皆禹時書也不但刻劇五岳諸名山亦然刻山
之獨高處爾今書是臣朔所具見其王母所道
諸靈數禹所不履唯書中夏之名山爾臣先師
谷希子者太上真官也昔授臣崑崙鍾山蓬萊
山及神洲真形圖昔來入漢留以寄知此書尤
重於嶽形圖矣昔也傳授年限正同爾陛下好
道思微甄心內向天尊下降並傳授寶秘臣朔
區區亦何嫌惜而不陳所有哉然術家幽其事
道法秘其師術泄則事多疑師顯則妙理散願

且勿宣臣之意也

武帝欣聞至說明年遂復從受諸真形圖常帶之肘後八節當朝拜靈書以書求度脫焉朔謂滑稽逆知預觀帝心有美萬乘傲公侯不可得而師友不可得而喜怒故武帝不能盡至理於此人矣

增修埤雅廣要卷第五

終

增修埤雅廣要卷第六

方國類

交趾國

交趾南方之偉國也國臨海甞並古城等國以
自益島與諸國多畏之國人立則交兩足趾故
名卽古交州也其方甚炎每一歲穀再稔雖冬
不緒衣惟曾縞客至則設檳榔食頂面頰頰音
紅如飲醇醑民性巧慧他國殆不如也歷代貢
通中國其俗密以土置饅中獻使者卜休咎受
之則貢不受則不貢也有元陳剛中使其國其

館伴曰交南之竹截爲器可代甕盎亦卉中之巨擘也中朝其有此乎剛中曰殆有甚焉取行篋窮葉以示館人駭之至今通貢不絕

占城國

在海西南自廣州發舶至諸蕃惟占城爲近順風八日可達國人多姓翁廣舶到其國卽差蕃官摺黑皮爲策書白字抄物數監盤上岸十取其二外聽交易如有隱漏籍没入官若民人山爲虎所噬或舟行被鱷魚之厄其家指其狀詣王王命國師作法誦咒書符投名死所虎魚卽

自投赴請命殺之若有欺詐誣害之訟官不能
明令競主過鰐魚潭其負理者魚卽出食之理
直者雖過十餘次鰐魚自避去宋時元嘗入貢
中國今

大明奄有四海諸蕃悉皆歸附矣

賓童龍國

隸占城占城選人作地主出卽騎象或馬打紅
繖同從者百人執盾贊唱曰亞僕番語也以葉承
食椰子酒每歲貢方物於占城今羅漢中有賓
頭盧尊者蓋指此今訛爲童龍佛書所謂王舍

城卽此地也人云目連舍基尚存

登流眉國

屬真臘選人作地主主堆髻纏帛蔽形每朝蕃主出座名曰登場衆蕃皆拜罷同座交手抱兩膊爲禮如中國叉手也

真臘國

舟行北風十日可到天氣無寒每嫁娶則男婦女舍最可笑一事國人生女至九歲卽請僧誦經作梵法以手指挑損童身取其紅點其額其母亦用點額喚爲利市云如此則其女他日嫁

人諧好歡洽宜其室家凡女滿十歲卽嫁若其妻與客合夫卽喜自詫云我妻有姿色且巧慧故人暱云國人犯盜則斬手斷脚燒火印印曾背黥其額犯罪至死則斬或削木椽其尻死令衆以當絞罪蕃殺害唐人卽依蕃法償死如唐人殺蕃至死卽童罰金如無金則賣身取金贖之

三佛齊國

自廣州發船取正南去冬日乘北風半月連夜至凌牙門五日方入三佛齊國以木作柵爲城

別無產物國人俱姓蒲習水陸戰臨陣敢死官兵服藥刀箭皆不能傷以此霸於諸國前後每國王先用金鑄形質以代其軀運一室以金爲器皿供奉甚嚴其金像器皿各鐫誌示後人勿毀代代如此近世有一王見所積金身器頗多竊之則罪至死儲之則不敢開盡載之舟至大海沉之舊傳其國地面忽然穴出生牛數萬人取食之後用竹木窒其穴乃絕屢人貢於中國

單馬令國

唐船自真臘風帆十晝夜可到其國無主有地

王宋朝慶元二年進金三埕金傘一柄

佛囉安國

自凌牙蘇家風帆四晝夜可到亦可遵陸有地
王亦係三佛齊差來其國有飛來銅佛二尊名
毘沙門王佛內一尊有六臂一尊有四臂每年
六月十五日係佛生日地人并唐人迎引佛六
尊出殿至三日復回其佛甚靈如有外國賊船
來劫奪佛殿寶珠至港口卽風發船不得渡多
是就港口搶劫他人往別國賣每一人鬻金四
兩或五兩如國內民妻與人有姦卽罰所姦人

金四五兩還本人却以妻嫁與之

晏陀蠻國

自藍無里國去細蘭國如風不順飄至一所地名晏陀蠻周圍七千里人身如黑漆能生食人船人不敢艤岼山內無寸鐵皆以琤渠蚌殼磨銛爲刃其上有聖跡用渾金作床承一死人經代不朽常有巨蛇衛護其蛇毛長二尺人不敢近有一井每歲兩次水溢流入於海所過沙石經此水浸皆成金舊傳曾有舩船壞船人扶木飄至此山潛以水筒盛滿乘水信風飄流至南

毘國以獻國王試之果驗遂發七船欲併收此
山未至爲惡風所壞船人至山盡爲山蠻所食

大闍婆國

名重迦盧離莆家龍風帆八日乃至舊傳國王
係雷震石裂有一人出後立爲王其子孫尚存
人物舉措一如莆家龍產青鹽係海潮入田曝
成顆粒及產綿羊鸚鵡與真珠寶物之類

大食弼琶囉國

無國王有四座州其餘皆是鄉村本國不發船
爲無國王故也惟阜宿土豪更互主事遇婚娶

時女家報約取牝牛一隻有孕者斷其尾爲信
從斷牛尾日爲許婚之期候牛生犢時始還男
親須要男家割人尾來女家還元割牛尾期信
人尾蓋男子陽物也以爲聘幣至則女家喜以
鼓樂迎導徇於街者七日男乃入女舍婚合是
一家還親則使男子絕命也蓋風俗相尚欲顯
其婿之雄傑如無此物女家永不還親其國俗
自古而然大抵無君長各以豪強相尚地產利
物名駱馳鶴身長六七尺有翼能飛但不甚高
耳食離物并炙火或燒赤熱銅與之食生卵如

椰子破之如甕甕有聲國人好獵每三日一出獵以藥箭射取獸物

大食勿拔國

邊海天氣暖甚出乳香樹他國皆無其樹逐日用刀斫樹皮取乳或在樹上或在地下在樹自結透者爲明乳蕃人用琉璃瓶盛之名曰乳香在地者名塌香每歲春末有一等飛禽自天而降不知出沒白如絲鵲大如家雀肥甚而味極佳每旦天明卽四散飛泊日出則絕不見影國人張羅殺食之惟春暮一月有之交夏則絕每

歲嘗有大魚死飄近岸身長十餘丈高二尺餘
國人不食但剗其膏爲油多者二三百斤肋骨
作屋桁脊骨作門扇骨節可爲臼又有龍涎全
不知所出忽見成塊飄泊岸下地人爭競貨買

大食勿斯離國

秋時露降朝陽曝之卽成糖霜真甘露也有樹
一年生如栗子而長名曰蒲盧可採食之次年
再生卽名麻茶澤沒石子也明年又生栗子是
間歲方生沒石子一根而異產亦可恠也產麥
每粒長三寸甜瓜每箇大五六尺石榴每箇重

五六斤桃子每箇重二斤香椽每箇重二十斤
菜每根可重十餘斤葉長三四尺米麥皆開地
窖之經三四十十年不壞穿井百餘丈乃獲見水
又產胡羊高三尺餘其尾如扇每歲春時割取
脂二十餘斤再縫合仍生不取則脹死

麻羅奴國

野島賊居其上若他國有船飄落則羣起捉人
燒食取其腦蓋爲飲食器父母死則召親戚槌
鼓共食之非人類也

崑崙層期國

常有鵬飛則遮日能食駱駝有人拾得其翅
截其管作水桶海島內有野人身如漆國人誘
捉賣與蕃商作奴

西天南尼華羅國

事佛教尊牛屋壁皆塗牛糞以爲潔各家置壇
以牛糞塗置花水麝香供佛蕃商到不得入屋
只坐門外

天竺國

隸大秦國所立國王悉由大秦國選擇俗皆辮
髮垂下兩鬢以帛纏頭衫袴鞋襪國內取聖水

能止風濤蕃商以琉璃瓶盛之若遇風濤以水灑之立止

默伽國

古係荒郊無人煙因大食國祖師名蒲囉咩自幼有異狀長娶妻在荒野生一男子無水可洗弃之地母走尋水不獲及回見其子以脚擦地湧出一泉水清甚此子立名司麻煙砌成大井逢旱不乾泛海遇風濤以此水灑之則應手而止

勿斯里國

屬白達國節制其國終歲不雨國人有七八十
歲不識雨者止有一大江水極清甘美不知其
源所出遇其時水溢四十日浸滿田疇候水退
而耕其田管下有二州名甜野亦近此江兩三
年間有一老人自江水中出髮鬢皓白坐於水
中石上國人拜問吉凶其人不語若笑則其年
豐稔若蹙額爲悲狀則必有饑疫坐良久復入
水中相傳古有聖人徂葛尼建塔頂上有鏡如
他國有兵船來其鏡先照見

斯伽里野國

近蘆眉國界國有山山上有深穴四季出火國人相與扛舁大石重五百斤或千斤拋放穴中須臾自然爆出皆辟如浮石每五年一次火從穴出流轉至海邊復回所過林木皆不燒遇石焚之如炭

默伽臘國

有國王海出珊瑚樹國人採之用縹縛十字木將麻線亂絞在十字上用石墜入江中棹船拖索刮取其樹古云鐵網取珊瑚蓋此類也

茶弼沙國

前後並無人到惟古來有聖人名徂葛尼曾到
其國遂立文字該載其國係太陽没入之地至
晚日入其聲洪於雷霆國王每於城上用千人
吹角及鳴鑼打鼓雜混日聲不然則小兒驚死
也

都播國

鐵勒之別種分爲三部自相統攝其俗結草爲
廬無牛羊不知耕稼多百合取以爲糧衣貂鹿
之皮貧者亦緝鳥羽爲服國無刑罰偷盜者倍
徵其贓

出神異錄

奇肱國

民能爲飛車從風遠行湯時西風久下奇肱人車至於豫州界中湯破其車不以示民後十年東風復至乃使乘車遣回其國去玉門之西一萬里

出博物志

頓遜國

梁武帝時貴方物國在海島上其俗人將死親賓歌舞送於郭外有鳥如鵞而色紅飛來萬家人避之其鳥食肉盡乃去卽燒骨以沉海中謂之鳥葬

窮神秘苑

骨利國

居回紇北方瀚海之北地出名馬晝長夜短日
沒後天色正曛煮羊一胛才熟東方已曙

神異錄

大食國

在西南二千里有國山谷間樹枝上花生人首
如花不解語人借問惟笑而已頻笑輒彫落

乾陀國

音尸毘王之倉庫爲火所燒蕩其中有粳米焦
者于今尚存若服一粒則終身不患瘧疾

墮波登國

在林邑之東南接訶陵國西接迷黎國種稻每
月一熟有文字卽書于貝多葉死者乃以金缸
貫於四肢然後加以婆律膏及檀沉龍腦積薪
燔之

出神異記

訶陵國

在真臘之南豎木爲城造大屋重閣以櫻皮覆
之以象牙爲床以柳花爲酒以手撮食有毒常
人與之宿處卽生瘡與之交會卽死旋液着草
木卽枯

出神異錄

孖億國

三千餘里氣候常暖冬不彫落產羊馬無
馳牛宜五穀出金鐵衣麻布舉俗事妖不識佛
法有妖祠三百餘所每一日造食一月食之常
喫宿食酉陽雜俎

懸渡國

烏耗西有懸渡國山溪不通唯引繩而渡土人
佃於石間壘石爲室接手而飲互相牽引所謂
猿引是也雜俎

烏菴國

民有死罪不立殺刑唯徙空山任其飲啄事涉

疑似以藥服之清濁自驗隨事輕重卽決

出伽藍記

繳濮國

永昌郡南千五百里有繳濮國其人有尾欲坐
乃先穿地作穴以安其尾若邂逅誤折其尾卽
死

出廣州記

撥拔力國

在西南海中不識五穀食肉而已常針牛畜取
血和乳生飲無衣唯腰下用羊皮而掩之

于闐國

婦人袴衫束帶走馬與丈夫無異死者以火燒

收骨葬之上起浮圖居喪者剪髮長四寸

伽藍記

女人國

居東北海角與奚部小如者部抵界其國無男
每親井卽生也

訶條國

金遼山寺有鼉衆僧飲食將盡向石鼉作禮則
飲食悉具

酉陽雜俎

道明國

大不着衣服見着衣服者卽共笑之俗無鹽鐵
以竹弩射蟲鳥

朝野僉載

義渠國

秦之西有義渠國其親戚死則娶柴而焚之薰屍於煙上謂之登煙霞

事見墨子

貫胷國

在盛國之東其人胷有竅尊者去其衣令卑者以物貫其胷擡之又有不死人在國之東其人長壽不死居圓丘上有不死樹赤泉食之乃壽

長臂國

在海之東其人垂手至地有人在海中得布衣兩袖長丈有餘又有長脚人常負長臂人入海

捕魚今之撓同人蓋象此也與長臂國相連

下靈國

在海內其人從膝下生毛馬蹄善走自鞭其脚
一日可行三百里

聶耳國

在無腹國之東其人虎文兩手聶耳而行耳長
及頰行則手捧之

無脊國

脊肚腸也

在北海外爲人無脊穴居死卽埋之其心不朽
二千歲乃復生

一臂國

在西海之北其人一目一孔一臂一脚半體比肩猶魚鳥相合

三身國

在夏后啓之北其人一首三身

二首國

在鑿齒國之東其人一身二首

無腹國

在深國國東其人男女皆無

柔利國

其人反膝曲足居上一手一足

交脛國

其人交脛言脚脛曲戾相交也

小人國

名曰埤長九寸海鶴吞之

龍伯國

崑崙以北九萬里龍伯國人長二丈萬八千歲
乃死

類說

狗首國

契丹北有狗國人身狗首長毛不衣語若狗嗥

其妻皆人能漢語生男爲狗生女爲人自相婚嫁
穴居食生妻女食熟有中國人至其國妻使
逃歸以箸十餘隻教其行十里遺一隻狗逐之
見家物必銜歸則復去再四則不及追矣

五代史

長鬚國

有士人漂海落長鬚國王以女妻之有鬚數十
根蓋蝦國也

類說

烏衣國

王謝唐人居金陵航海遇風破船附板抵一洲
見翁媼皆皁衣曰吾主人郎也引歸明日見王

王愛其才以女妻之謝問女曰此烏衣國也翼
日王召宴於寶墨殿命賦詩末章云恨不此身
生羽翼女曰何相譏也王不說遣回某日命取
飛雲軒令謝入其中閉目少息至家惟見梁上
雙燕而不見軒乃悞入烏衣國爲燕子也及燕
歸以詩繫燕足與妻曰悞入華胥夢裏來主人
終日苦憐才雲軒一去無消息淚灑東風幾百
回明春燕復來妻繫詩云昔日相逢冥數合今
朝隔別是生離來春總有相思字三月天南無

鴈飛

撫遺

槐安國

淳于棼宅南有古槐嘗醉臥其下夢玄衣使曰槐安王奉邀往入大城題曰大槐安國傳呼曰駙馬遠降升廣殿一人練服朱冠令拜王曰奉賢尊命令女瑤芳奉承君子佳姬數千奏樂執蠟金翠步障至一門曰修儀宮號金枝公主儼若神仙成禮相洽王曰吾南柯郡政事不理屈卿爲守勅有司具車馬錦綉餞公主行夫人戒子曰淳于郎性剛嗜酒爲婦當柔順事之至郡驅車省民風郡大治凡二十年王賜爵邑生男

五女二公主以疾卒王請護表赴國王與夫人
素服郊迎葬于盤龍岡有上表云國有大恐宗
廟將壞王使送生暫歸遂寤斜日未隱因尋槐
下穴大可容榻有蟻數斛二大蟻素翼朱首又
窮一穴直上南柯郡蟻處其中生感歎之是夕
風雨大作明旦視之羣蟻不知所之

事文類聚

高車國

單于王女甚美置高臺上有老狼守臺遂爲狼
妻產子後遂爲高車國

北史

異境類

華胥國

黃帝晝寢夢遊華胥氏之國既覺怡然自得天下大治如華胥之國

列

鈞天樂

秦繆公夢至帝所觀鈞天廣樂帝錫以策秦遂

昌

史

趙簡子曰我之帝所與百神遊於鈞天廣樂九

奏萬舞

扁鵲傳

梯仙國

房州竹山縣陰隱客家濬井千尺無水工人不

覺至一國題云梯仙國初得道者送此修行及
出還房州陰家已三世矣工人自後莫知所在
博異記

廣寒府

天寶遺事唐明皇遊月宮見天府榜曰廣寒清
虛之府見素娥十餘人皓衣乘白鸞舞於桂樹
下東方朔十洲記云冬至後月養魄於廣寒宮

小成都

圖經云宋元嘉間有樵夫於山左見羣鹿引弓
將射之有一麕所趨險絕隨入石穴行數十步

則豁然平衍邑屋連接阡陌交通問是何所有
人荅云小成都後更往尋之不知所在

華陽洞

李允川政和間至和州游近郊不覺墜穴中黑
如夜稍進漸明見石池中荷花爛熳天日晃曜
有石幕局聞誦經聲不見人已而忽至道旁僧
寺問僧乃滁州境也已是七日纔一晝爾其所
至乃華陽洞也

夷堅志

天台洞

在剡漢明帝時劉晨阮肇入山採藥食盡見桃

實食之身輕見一杯流出胡麻飯屑溪邊二女子笑曰劉阮二郎至矣便迎歸留半載求歸劉阮出洞口還鄉驗得七代子孫傳聞上祖入山不出二公復欲還女家尋山路不獲太康八年失二公所在

朱明洞

蘿浮山有深洞幽邃旁達約數千里號朱明洞

武陵溪

晉大元中武陵漁人溪行忽逢桃花林窮林得一山從小口入行數十步土地平曠屋舍儼然

田池桑竹悉如外人見漁人大驚自云先世避秦亂來絕境問今何世乃不知有漢晉漁人辭去詣太守言卽遣人隨往竟迷不得路

雙石廩

衡山有三峯極秀曰紫蓋曰石菌曰芙蓉上有泉水飛瀑直下如練劉璘之好遊山澤採藥至岳深入忘反見有一澗水水南有二石筍一開一閉水深不得過遂反

九仙館

有誤墜洛中洞穴者見宮殿人物凡九處大羊

髯有珠其人取食之出問張華華曰此九仙館
也大羊乃癡龍也

蹟言

增修埤雅廣要卷第七

人道門

人紀類

盤古

天地混沌如雞子盤古生其中神于天聖于地
開目爲晝閉目爲夜萬八千歲天地開闢陽清
爲天天日高一丈陰濁爲地地日深一丈盤古
在其中日長一丈一元九變而天極高地極深
盤古極長歷萬八千歲天後左目爲日右目爲
月吹爲雷電噓爲風雨腸爲江河血爲淮瀆骨

節爲山岳毛髮爲草木萬物自此分矣

人極

人極肇端自鰲極旣判天地設位而人立乎其
中參之而爲三才易曰立天之道曰陰與陽立
地之道曰柔與剛立人之道曰仁與義蓋人與
天地並其道流行於宇宙之間未嘗一日泯沒
也苟人道一日而不立則造化亦幾乎熄矣開
闢以來由伏羲以至於今上下四千餘年天地
之所以高厚日月星辰之所以運行山岳河海
之所以流峙亘古今而無弊者亦以人道立乎

其間實主張是實綱維是此所以能參天地贊
化育而相爲無窮者也則夫負陰抱陽戴天履
地任三綱五常之寄以爲人者其可忽諸

太古

天皇氏以木德王歲起攝提無爲而化兄弟十
一人各一萬八千歲地皇氏以火德王兄弟十
一人亦各一萬八千歲人皇氏兄弟九人分長
九州凡一百五十世合四萬五千六百年人皇
以後有曰有巢氏構木爲巢食木實至燧人氏
始鑽燧教人火食自伏羲畫八卦而文籍始生

神農作耒耜而耕稼始立黃帝造律曆而樂音
始著堯舜垂衣而禮制始明凡此以上聖人所
以開天地之經立生人之紀使後之作者有所
持循施及百千萬世綱理變常之道皆由此而
出也

皇王

皇大也從自王自始也徐曰自從也故爲始也
今文省作皇大也正也光也美也謂皇之儀煌
煌而莊盛也皇之爲言王也王者天下所歸往
也董子曰古之造文者三畫而連其中謂之王

三者天地人也參而通之者王也孔子曰一貫
三爲王故李陽冰曰王者之王中一畫近上象
王者則天之義皇王者天下之大君也凡生於
窮壤之兩間者莫非父天母地之子也然繼承
天地以統理萬物者則大君也夫大君者握乾
主坤建中立極窮神知化致和體道明則並於
日月幽則協於人神化隆寰宇澤被生靈夫然
後天地位焉萬物育焉若書所謂三皇五帝是
也

儒

儒之爲言柔也奮柔體剛克明道藝由修身及家國以至化成天下而後已者也故曰儒原夫鴻儒教主先聖素王姓孔名丘字仲尼聖躬之誕生也曾襄公二十一年十一月庚子是夕二龍繞室五老降庭母顏氏聞奏鈞天之樂空中有聲云天感生聖子故降以和樂笙鏞之音旣誕而有文在其胷曰制作定世符手握天文足履度字眉有一十二彩目有六十四理身長九尺二寸腰大十圍凡四十九表坐如龍蹲立如鳳時望之如什就之如昇明並日月道隆彙敘

發龜龍銜負之祕闢七政五緯之蘊乎義農軒
皇之能具堯舜周公之美攝行相事而四方則
焉巡振教鐸而天下警焉刪詩書定禮樂修春
秋繫周易游六藝門徒三千博徒六萬達者七
十二人昔先聖未誕之時有麟吐御書於闕里
其文曰水精之子係周衰而素王顏氏異之以
繡紱繫麟角信宿而去哀公十四年西狩大野
叔孫氏車子鋤商獲獸有繫紱訪於先聖先聖
歎曰斯麟也胡爲來哉吾道其窮矣夫時方假
曾史寓王法至此而閣筆焉聖年七十有三夢

奠兩楹之間乃薨葬魯城北泗上哀公十七年
立廟於舊宅置守陵廟百戶弟子收其衣冠琴
瑟車書以藏于廟當時弟子及魯人往從家而
家焉者復百有餘室因命其里曰孔里歲時奉
祀永永相傳子孫世襲公不絕繼世而王者累
封聖號曰大成至聖文宣王是爲古今文章之
祖歷代帝王之師由是教覃海宇化洽華夷而
生民倫彙之敘永賴以安春秋釋奠而無窮焉

佛

佛之爲言覺也自利利他自覺覺彼普覺羣生

出諸迷途而登覺岸者也故曰佛原夫大乘教
主釋迦文佛之示現也周昭王二十四年四月
八日生西竺利利王家母摩耶夫人右脇而出
周行七步地湧金蓮自然捧足分手指天指地
作獅子吼聲云天上天下惟吾獨尊具三十二
相八十種好既長捨位出家人雪山而證無上
道果開鹿苑而轉四諦法輪壽年八十住世四
十有九說五千四十八之妙典開八萬四千之
法門化囿無邊光騰無礙恩覃無際利及無央
爲人天之導師作四生之慈父所謂天上天下

無如佛十方世界亦無比末年告弟子摩訶迦
葉曰吾以清淨法眼涅槃妙心實相無相微妙
正法今付於汝汝當護持并勅阿難副貳傳化
無令斷絕及欲涅槃復告摩訶迦葉曰吾將金
縷僧伽梨衣傳付於汝轉授補處至慈世尊出
世勿令朽壞摩訶迦葉聞付囑已頭面禮足曰
善哉善哉我當依勅恭順佛故爾時世尊以涅
槃故告諸大衆往于熙連河側娑羅雙樹下右
脇累足泊然宴寂金棺從坐而舉高七多羅樹
往返空中三昧化火自出荼毘得舍利八斛四

斗卽穆王五十二年二月十五日也自後千年
教始至中夏漢明帝夜夢金人身長丈六項佩
日輪飛至殿庭以問羣臣傅毅對曰臣聞西方
有神其名曰佛陛下所夢將必是乎乃遣中郎
將蔡愔博士王遵等十有八人西訪其道果得
其像及經并沙門迦葉摩騰竺法蘭二大士以
歸洛焉由是其教大興迨今緇檀崇奉所有衆
生普率皈依利其利而覺其覺者殆將若涇河
沙之不可算矣

僊

僊之爲言遷也含真體道厭凡超俗羽化而遷
昇也故曰僊原夫玄風教主太上老君姓李名
耳字伯陽聖躬之降生也記稱湯甲十七年庚
申太上自太清常道境乘太陽日精化五色玄
黃大如彈丸時玉女晝寢流入口中吞之而孕
懷八十一歲至武丁九年庚辰玉女至李樹下
剖左腋誕生而白首號曰李子因指其樹曰此
吾姓也兩耳曼上而垂下又名曰聃按聖紀經
云太上老君居太清境乃元氣之祖宗天地之
根本於至寂至虛之內太初太始之先推數御

運布氣融精開化天地所歷成壞不可量計化
身周徧亦非算數紀極開闢之後觀世代之澆
淳代爲帝師隨時施教自三皇而下咸崇奉焉
是謂天上天下道氣之內皆老君之化蓋百姓
日用而不知也逮周爲柱下史孔子往問焉爲
之語曰良賈深藏若虛君子容貌若愚孔子退
謂人曰旣而駕青牛至函谷關有紫氣浮其上
關尹喜占其氣而候之爲著道德五千言抵西
而邁云往崑崙莫知所終後至唐武德中晉州
人吉善行者於羊角山見白衣老叟呼曰爲吾

語唐天子吾爲老君乃唐祖也高祖因立廟高
宗追尊玄宗皇帝明宗追尊聖祖高上大道金
闕玄元天皇帝宋真宗祥符間奉上尊號曰太
上老君混元上德皇帝

士

今夫士羣萃而州處閒燕則父與父言義子與
子言孝其事君者言敬其幼者言悌少而習焉
其心安焉不見異物而遷焉是故其父兄之教
不肅而成其子弟之學不勞而能夫是故士之
子常爲士

工

今夫工羣萃而州處安其四時辨其功苦權節其用論比協材旦暮從事施於四方以飭其子弟相語以事相示以巧相陳以功少而習焉其心安焉不見異物而遷焉是故其父兄之教不肅而成其子弟之學不勞而能夫是故工之子常爲工

商

今夫商羣萃而州處察其四時而監其鄉之資以知其市之賈負任檐荷服牛輶馬以周四方

以其所有易其所無市賤鬻貴旦暮從事於此以飭其子弟相語以利相示以貨相陳以價少而習焉其心安焉不見異物而遷焉是故其父兄之教不肅而成其子弟之學不勞而能夫是故商之子常爲商

農

今夫農羣萃而州處察其四時權節其用耒耜耨芟及其寒也擊草除田從事於田野脫衣就功首戴茅蒲身衣襁褓霑體塗足曝其髮膚竭四支之勞以從事於田野少而習焉其心安焉

不見異物而遷焉是故其父兄之教不肅而成其子弟之學不勞而能夫是故農之子常爲農

人性類

性理

人之性仁義禮智四德具焉其愛之理則仁也宜之理則義也序之理則禮也知之理則智也是四者雖未形而其理固根於此則體實具於此矣性之中只有是四者萬善皆管乎是焉而所謂愛之理者是乃天地生物之心而其所由生者也

心性

盡其心者知其性也知其性則知天矣言能盡其心是知此性知此性則知天也蓋天者理之自然人之所由以生者也性者理之全體而人之所以生者也心則人之所以主於身而具足理者也天大無外而性稟其全故人之本心其體廓然亦無限量惟其梏於形氣之私滯於聞見之小是以有所蔽而不盡人能卽事卽物窮究其理至於一日會通貫徹而無所遺焉則有以全其本心廓然之體而五行之所以爲性

與天之所以爲天者皆不外乎此而一以貫之矣

性命

夫性命者人物之所同得之理也非惟已有是人亦有是非惟人有是物亦有是但所稟之差爾性有善惡命有吉凶援之以性配之以命受氣有善惡天無可以奈何亦以吉凶之命配之此定命也能盡其性然後知生無所得則死無所喪矣天所性者通極於道氣之昏明不足以蔽之天所命者通極於性遇之吉凶不足以戕

之不免乎蔽之戕之者未之學也性通乎氣之外命行乎氣之內氣通內外假有形而言爾故思知人不可不知天盡其性然後能至於命知性知天則陰陽鬼神皆吾分內爾天性在人正猶水性之在冰凝釋雖異爲物一也受光有小大昏明其照納不二也

道德

天地間至尊者道至貴者德而已矣至難得者人人而至難得者道德有於身而已求人至難得者有於身非師友則不可得也已循天下之

理之謂道得天下之理之謂德故曰易簡之善
配至德道者率性之謂德之爲言得也行道而
有得於心也百順之謂福至當之謂德德乃福
之基福乃德之致君子遵道而行無入而非百
順然後能無方體能無方體然後能無我則與
天地參矣日新之謂盛德過而不有不凝滯於
心知之細也浩然無害則天地合德照無偏繫
則日月合明天地同流則四時合序酬酢不倚
則鬼神合吉凶天地合德日月合明然後能無
方體能無方體然後能無我禮器則藏諸其身

用無不利禮運云者語其達也禮器云者語其成也達與成體與用之道合大人之事備矣萬物皆備於我言萬物皆素有於我也反身而誠謂行無不慊於心則樂莫大焉未能如玉不足以成德未能成德不足以孚天下修己以安人修己而安人不行乎妻子況可愾於天下斯正己而不求於人不願乎外之盛者歟

魂魄

淮南子曰天氣爲魂地氣爲魄氣於人生而不離死而遊散者魂聚成形質雖死而不散者魄

魂陽氣也魄陰神也左氏云物生始化爲魄既生魄歸爲魂蓋魂者神也陽也氣也魄者精也陰也形也魂氣歸於天體魄復于地是謂氣血之精靈身心之精爽也白虎通云魂者沍也猶沍沍行休也魄者迫也猶迫迫著於是矣

動植

凡物之初生氣日至而滋息物生旣盈氣日反而游散至之謂神以其伸也反之爲鬼以其歸也有息者根於天不息者根於地根於天者不滯於用根於地者不滯於方此動植之分也夫

人之生也有先後所以爲天序小大高下相並而相形焉是謂天秩天之生物也有序物之旣形也有秩知序然後經正知秩然後禮行寤則形開而志交諸外也夢則形閉而氣專乎內也寤所以知新於耳目夢所以緣舊於息心斯寤夢之感之所以異也

增修埤雅廣要卷第七